

四庫全書

史部

欽定四庫全書

史部

歷代名臣奏議卷一百八十三

詳校官編修臣周瓊

編修臣裴謙覆勘

總校官編修臣王燕緒

校對官助教臣汪錫魁

謄錄監生臣黃祐

欽定四庫全書

歷代名臣奏議卷一百八十三

明 楊士奇等 撰

去邪

宋高宗時胡寅繳劉閻復秘閣修撰疏曰臣謹按劉閻  
殷事蔡攸以叨官爵天下共知其所歷差遣則為大晟  
府按協聲律則為提舉道錄院管幹文字而非士大夫  
之所肯為也其所轉官則緣按樂精熟及修道錄院與

管幹明節皇后園陵而非年勞之所當得也其所賜帶  
則因撰祥應記而非品職之所當賜也其所被謹則以  
臣察論其諂事蔡攸交結童貫而貶降則以臣察論其  
詭計秘謀附會姦惡而褫職至於勒停廢棄不與士齒  
而非過誤不幸情可矜宥之人比也今已累緣赦恩盡  
還官秩食祠官之祿僥倖甚矣乃敢陳狀訴求復職無  
恥之心未嘗悛改若使參華中秘與論撰之列則名儒  
碩學寓處其間者心將謂何臣恐非勸懲之道也伏望

聖慈別降指揮所有錄黃臣未敢書行

寅又繳湖北漕司辟許宜卿為桃源令疏曰臣竊以湖北昨來民聚為盜止緣守宰貪虐政煩賦重所致令平定之初縣令尤宜再三慎擇如人以酒色伐身幾致危殆藥攻之後氣血乍復凡昔日所以生疾者一切屏遠輔以良劑養以珍羞加以歲時庶幾復舊若仍以嗜欲戕賊之則不可復救矣謹按許宜卿者建炎二年曾知湘陰縣到任未幾即取祇應弟子為妻就本縣創造大

第窮土木之役百姓交訴為潭州帥臣所劾值番騎破城獄事不究後權湘潭縣纔四十日比其解去滿邑胥吏攀船號送又相與裒集賄賂於上司借留而百姓重足一迹畏見其面去年宜卿有族人客死於潭州境內宜卿託名經理其家乃盜發其囊篋及私其婢女為族人之子訴於潭州又訴於監司尚未結絕也宜卿往潭州九年睥睨富貴縣分密結胥吏搖動見任人常有奪攘之意賴其惡聲已著上下共知計不得發其人材大

槩如此而可以牧民乎今乃投名湖北漕司僥倖奏辟  
知桃源縣契勘桃源是鍾相所起之地其疾視令宰虐  
已為甚故倡亂之日首殺縣官今當委付何等循良庶  
弭後日之患乃用宜卿輩此何異於以嗜慾戕賊大病  
初愈之人欲其久生不可得也漕臣以刺舉為職而所  
薦如此知而舉之是不忠也不知而舉之是不明也一  
路何賴焉桃源赤子何其重不幸哉今宜卿先次赴任  
已是逾月想見遺民已在鼎鑊伏望聖慈速降指揮罷

斥仍戒約本路監司帥臣每有奏辟必加審詳如所舉  
繆妄再致臣寮論列重賜黜罰施行庶幾一路官吏上  
下得人以慰惟新之望所有錄黃臣不敢書行

寅又論吳升莫儔徐秉哲疏曰臣謹按吳升莫儔徐秉  
哲等致身侍從偷生惜死奉女真之意將祖宗一百六  
十年神器泣涕來往交割與叛臣張邦昌為邦昌之臣  
行邦昌之政施施然自肆非不得已也怨在七廟天下  
仇之貸死投荒失刑甚矣猶萬冀一少絰公議者謂無

湔洗之理耳今乃節次用赦許令自便是教人使反覆賣國戕毀三綱豈撥亂反正之道乎昔者世衰道微暴行有作臣弑其君子弑其父孔子為此大懼而作春秋以俟後世有能舉行其法者其法謂何莫嚴於討賊矣陛下志在春秋固將見諸行事深切著明況當艱難之時逆臣僭竊反面事之者皆我臣庶天下大變也若不申著君臣之義以立國政則乾綱解紐賊亂接迹人欲放肆天理淪滅亦何所不至哉所有吳升遂便指揮下

臣皇恐不敢書行

寅又繳傳雩用赦量移疏曰臣謹按傳雩於建炎三年為宣撫處置使司主管機宜文字徑至荆南自稱湖北路制置使以撫定孔彥舟為名入其軍中相與渡江過澧州與澧州通判任誼竭取民之膏血以啗彥舟因以自潤百姓怨苦乃從鍾相為寇彥舟不敢安處遂破鼎州遣兵擊敗鍾相又以押送為名直犯湖南入據潭州已而大掠潭衡旁及永邵三湘千里之內公私舟船為

之一空最後自衡順流下岳鄂為蘄黃路鎮撫使雱皆與之終始其事彥舟凶狡初不識知文法凡奏請文移欺惑朝聽侮弄三尺詭詐百端皆雱教之至於州縣應副錢糧不知紀極雱則公然乞於彥舟動以萬計營置田產皆有實狀李成江西之敗張用已就招安彥舟其時行次武昌兵勢窮蹙若乘機會一掃無餘雱又教之厚行賂遺躬自押送為之緩頰非獨免討且得兩州遂使彥舟自是北遁投於逆黨未即授首推究本末皆自

一雱人但知彥舟作賊之披猖而不知雱畫謀之姦祕  
原情定罪豈可赦原謹按春秋誅討亂賊之法尤嚴於  
與惡者夫欲為賊亂之事而人皆莫之與則無以自立  
於世其謀尚得施乎惟有與之者而法不加焉是以無  
所畏憚浸淫滔天雖陳旅誓師加以征討或有所不勝  
矣况雱身為朝郎職在省戶所為如此上干國體按據  
其罪揆以春秋之法就死司寇方為稱當得從羈置已  
是寬恩若遇赦文便許內徙使懷姦黨賊者安心自肆

指日貸宥不懼放流恐非式遏亂略修明軍政之道一  
雱雖小所繫則大伏望聖明深察別降指揮將雱永不  
量移以為後來羽翼亂賊之戒所有錄黃臣未敢書行  
御史中丞章誼上奏曰臣今月二十二日本臺據檢校  
少師武成感德軍節度使神武左軍都統制韓世忠狀  
繳到進呈劄子一本連粘在前臣初見關報給事中陳  
珙累乞宮祠遂蒙恩除職與郡其後頗聞因論執政樞  
機之臣於都堂樞府便衣燕服接見將帥坐此補外今

據韓世忠劄子所論則又可駭無而言之則世忠所聞之誤也陛下當召至便殿或諭以溫詔開釋其疑有而言之則世忠所謂乞行根治嫁禍之人者安可但已也夫敢於陛下之前造為世忠之語因以進退從官者陛下固知其人矣乞降姓名於外廷俾付有司密行推究大正典刑以絕後來誣譖之路孔子曰浸潤之譖膚受之懇不行焉可謂明也已矣可謂遠也已矣今將帥之臣人敢誣譖以誤陛下之賞罰其間如韓世忠能自陳

其區區以昭雪其誣謗者能有幾人哉若懷疑不釋不能自言於君父之前而與士大夫結為仇怨或與造言之人私相報復則禍亂之萌有不可勝言者今世忠能言之陛下又為別白其是非之所在則君臣之情固已無間文武兩班誠好相接譖愬之言非特不行又將陳露矣豈非社稷之福哉伏望睿明下臣此章與世忠所陳密與大臣措置施行不勝大幸

誼又論贓吏罪狀疏曰臣伏讀近降手詔以縣令之官

於民為最近且歎比年以來其選太輕貪汙殘暴靡所不有自京朝至于選人各令內外侍從官薦舉其闕次令三省選擇詔旨再下訓辭深厚中外傳聞士庶感悅有以見陛下憇惻愛民之意德至渥也臣愚以謂選用循良而不去貪汙殘虐之吏則廉平之士不勸非所以昭大化廣惠澤也臣請劇論贓吏一員仰冀陛下顯行誅斥以為天下縣令貪虐之戒臣聞衢州江山縣令某冒功得官頑傲無恥以苟得為心以殘酷為政漁獵一

邑之財封殖無饜之欲此蓋盜跖之居官者也嘗任獄  
司呂彊以溼紙掩百姓柴四之口而殺之於獄中聽保  
正家人偏詞而致百姓徐詢縊死於縣廨容弓手祝超  
乞取錢物而挽取毛衢之室女怒柴及柴直儒之欺詐  
而毀沒其屋業一歲盜用官田錢九千三百餘貫每月  
增添坊場錢二百五十餘千取人戶米藏於私家者七  
百餘石率皆不上赤歷侵盜入己其日用之酒則取足  
於貼司張七其日用之柴薪則取足於武勇鄭十其日

用之飲食則取於諸鄉書手其所任之吏王黨薛陟徐禮祝惠之徒納京銷白金十有六枚以資某行李之費此其貪虐之暴著者也其他與姦為市詭秘未露者不可勝數比者臺臣彈奏之章屢入朝廷取勘指揮亟下然而衢州知州是其長吏也為所劫持而不敢按發婺州處州承勘官司也許其請求而不肯追逮提刑轉運提舉司是其部使者也既不能按舉繩治又聽受權貴之囑託而留滯取勘指揮者累月有此三者以玩弄朝

廷之法令沮格陛下之詔旨宜其某之罪不可得而正也某之罪不正則州郡監司得以市私恩矣至於無告之民愁歎窮苦而咨怨每歸於陛下此臣所以痛心疾首知姦賊貪虐之吏為不可容也臣今體訪得某罪狀二十事皆賊私自盜枉法入己律所不貸者也雖更赦令自合推治臣乞檢會去年本臺十月奏疏併賜行下乞將某先次停罷然後追攝取勘究其罪犯所有前項三處官司沮格詔令遷延月日之罪亦乞特賜懲戒庶

幾人臣壞植散羣孤立一意以祗肅朝廷之紀綱奉承  
陛下之德澤

誼又上疏曰臣竊見比者宰執大臣建明政事初不審  
詳利害輕信小人浮偽之說如措置討論文臣濫賞二  
十六事衆議紛然不以為便陛下沈幾先物灼見可否  
睿斷英發亟行佳罷天地之施博矣臣今日以來乃聞  
宰相某堅執前議以寢罷為非遂抗章辭位臣不知某  
自言於陛下之前者何辭也若自以識暗才小不足以

明事之是非知人之情偽以誤陛下之號令而引愆自  
訟待罪私室則猶之可也若以言不行而求去則某之  
罪大矣某措置濫賞之議近則公卿士大夫微則武夫  
賤隸皆以為不可行也身為宰相以不可行之言進說  
人主而人主悟其非是不加譴呵止令寢罷自宜將順  
德美奉承周旋今乃家居自若不復治事孔子謂臧武  
仲雖曰不要君吾不信也其某之謂乎臣願睿明察臣  
此章以觀某進退之義則某之可罷可相斷可知矣

誼又上疏曰臣今月二十四日曾論宰相某不能將順  
陛下德美猶復堅執討論濫賞之議為可施行悻悻然  
以言不用而求去略無省愆念咎之懷而有要君無上  
之罪當行罷黜至今經日未蒙施行臣謹按某近者議  
三大政皆信妄庸之邪說以誤朝廷之號令自非陛下  
聰明照臨即行寢罷則取笑四方貽患萬姓召禍賈怨  
有不可勝言者臣得而詳言之比者某欲於淮南等路  
置宣諭使副而糧餉之餽兵革之衛一切紛擾若行其

議則京畿京西北淮南數路之人歸怨朝廷矣陛下  
知其不可斷然寢罷然後數路之人安某又欲盡取官  
田不問有人承佃無人承佃率行出賣而方量根括建  
官置吏一切紛擾若行其議則耕夫織婦敦本樂業之  
人無不歸怨朝廷矣陛下知其不可斷然寢罷然後四  
民之心悅某於此二事既以顛沛迷誤可以已矣又復  
信用堂吏滑浩俞宗适之言而建為討論文臣武臣濫  
賞之議書成奏御同列執政有不及知者若行其議則

中外文武忠臣義士賢愚功罪混為一區無不歸怨朝廷矣陛下知其不可斷然寢罷而某執迷遂非不肯奉詔移疾家居偃然自若此豈人臣事君之義哉今陛下既已更此三事之非出於睿斷天下之人感悅欣戴矣若某猶在相位則天下之人疑於前議之復行而遠邇之人無以自安伏望聖明亟罷某以清衆論

誼又上疏曰臣近者曾論奏總護使與橋道頓遞使不應收受朝廷給賜銀絹比見關報李回已遂回納而某

自請收受一半此何理也夫二使支賜之物或辭或受  
於朝廷未有甚加損然二使衆人之領袖也二使辭免  
則自餘執事之人可以息僥倖之心亦可以裁損其賜  
予之物此於邦財頗有省節誠非小補豈意某規一時  
之小利忘事君之大節不恤國家之禍難但計私室之  
有無自同羣隸獨願邦貺觀今日立朝之風操則可以  
推其平日之行已矣搢紳士大夫聞其如此莫不竊笑  
嗟歎憐其無戒得之心昧取舍之理誠不足表勵風俗

又安可以居獻納之地哉伏望聖明早賜罷黜以清班列

誼又彈浦城縣丞不法疏曰臣訪聞建州浦城縣丞某在任貪縱不法與姦為市結託監司僥冒功賞陵蔑同官殘害百姓仰負聖朝字民之意臣令得其罪狀甚衆略舉其罔上虐民之大者言之去年浦城縣百姓張德等因醉與鄰里爭競放火燒茅屋數間尋即悔悟自經而死某適出點察遣人斬其首級冒稱捕獲是時本路

監司保奏乞令某改官再任朝廷倚信使者之言不復  
驗實遂可其請某自是益橫陵其官長任意掊克每人  
戶三十家差催稅甲首一名每戶十日一次赴縣驅磨  
出寬限錢一貫文足浦城萬戶催稅甲頭三百有奇月  
為錢千緡矣某悉掩取之有甲頭姓陳人貧不能辦懼  
遭殘辱抗繩自絕某受納苗米一石輒取樣米二斗公  
然變賣市物入己又復虛增防縣保甲人數侵盜官錢  
停販衙前官鹽增價出售迫脅豪戶黃中甫乞取金銀

一邑士民殘擾殆徧方福建盜賊並興人未安業而邑  
丞貪縱不恤又復如此即有弄兵赤子相因而起其貽  
患朝廷豈細事哉伏望聖斷速賜罷黜付之有司推鞫  
實狀重寘典憲以勵其餘

誼又乞推鞫天台知縣申本州守臣受賂事疏曰臣竊  
見近者天台知縣某申尚書省及御史臺稱本縣百姓  
求珍殺人以金釵三十隻銀一百兩行賂於台州知州  
某之妻遂得不死其事暴著聞者駭聽謂求珍百姓也

敢通貨財以結郡太守之妻某郡守也敢因請求以擅朝廷生殺之柄然事之有無尚未可知而某為屬縣宰遽許其事以直聞於省臺三者皆罪干典憲事係風教不可以不覈實朝廷雖下本路提刑司體究然守令同在一州人情互有觀望歲月遷延獄將不直臣伏望聖慈特降指揮將于證人並付大理寺或從朝廷差就台州置司明白推鞫以靖衆論以儆在位不勝幸甚

左正言鄧肅上疏曰臣於今月初六日上殿論耿南仲

與其子延禧主和之過與李邦彥白時中吳敏等乞陛下明正典刑陛下以謂耿南仲真誤國者今越八日未蒙行遣臣切惑之謹再為陛下敷奏曾不知其為再三之瀆也臣嘗面奉孝慈淵聖皇帝面諭曰耿南仲嘗薦汝矣臣明日亦以門生之禮謁南仲於府第今此待罪諫省亦何忍獨論南仲父子之過耶然君父之德天下之公也恩門之德一己之私也臣亦安得以一己之私而忘天下之公平重念四五月間畏日流金雖庸夫販

婦亦以行色為難而使兩朝君父登小車涉險途作止  
飲食悉付他人之手親王貴族且數百人一旦蕩然皆  
在沙漠數千里之外使道路聞之皆為泣血此何自而  
然哉主和誤國墮敵計中正在耿南仲父子耳且臣之  
君父為南仲所誤如此義不戴天豈容默默陛下若念  
南仲父子嘗在艱難之中久從行在未忍賜罪則臣之  
言為失矣臣待罪諫省敷奏有失臣之罪也夫何面目  
尚稱諫臣雖微臣進退不足以為朝廷重輕然在臣之

節則不可以不立也臣視此命輕於螻蟻臣守此節重於邱山惟陛下察之

肅又奏曰臣竊觀前日臣僚上言有論偽楚之臣止論王時雍徐秉哲等未嘗輒論呂好問且王時雍等偽執政也呂好問亦偽執政也論時雍而捨好問豈非以好問今為右丞乎右丞之職天子命之也雖賢與否不得以盡知然偽楚之朝始為冊立使俄為門下侍郎此好問之迹亦昭昭矣論事之臣亦安得漏網以罔天子之

聽乎謹按好問本非姦雄但怯懦耳從王時雍遊致有  
叛臣之迹皆怯懦所致也今雖居宰職亦不能為朝廷  
患然國家艱難急於求賢豈容有怯懦無立之士廁述  
於二府乎好問在朝則偽楚姦臣必不盡責蓋有以蔽  
之也臣又聞中書舍人李會至今嘗語人曰張邦昌有  
伊周之志非謀逆者其推戴偽楚之心猶昔也謹按李  
會嘗拜偽楚之庭甘為禁從今日復廁朝班有愧同列  
遂為巧語以蔽邦昌嗚呼衣天子之衣而坐天子之殿

降赦令以朝百官擁殿班以稱陛下邦昌反狀雖三尺之童亦知之矣其臣李會不知何辭尚敢為之遊說乎且以邦昌為是則陛下責之為非是邦昌而非陛下信乎桀之大可使吠堯也臣所論叛臣乞陛下定罪章疏再上未蒙陛下一正典刑臣切考叛臣在朝今居二府者呂好問也令作從官者李會也臣愚欲乞先正此二人之罪以去其大者然後乞檢會臣所校者叛臣八種定罪二格一網而盡俾無遺漏庶幾可以少釋二聖之

怒以慰天下之望也惟陛下斷而行之毋惑羣聽取進止

肅又奏曰臣聞有同腹心之臣然後可與同患難有可與同患難之臣雖患難之來無足慮也孝慈淵聖皇帝恭儉之德可追湯禹一旦奇禍起於不測正為無同腹心之臣耳聖駕既出無一人以蒙塵為念者邀上皇則宮臣奉之邀太子則詹事奉之皇后諸王惟其所欲是舉朝之臣爭用私心捐上皇本支以保其私家耳嗚呼

痛哉古未聞也及偽楚一立則爭拜其庭略無難色有願為事務官者以講偽帝之禮有願為奉使者以結天下之心有閒為宮觀而下為庶官者皆彈冠而起爭為禁從甚者至有居宰執持樞柄傳呼道路洋洋得志其下下無能者及竭姦諛之心有名犯邦昌即請於朝以改之舉國委然知有偽楚而已儻言聖朝往往竊笑嗚呼淵聖皇帝其無腹心之臣如此烏能保天下哉不在圍城之中者不能盡知往往為姦人游說似是而非以

惑其聽凡在城內者又各食偽祿以汚其身故無肯為  
陛下盡言者遂致陛下雖念二聖之未回而惡叛臣之  
賣國稍正典刑以立朝綱終未足以慰天下之望而快  
二聖之怒也淵聖臨行以批諭徐秉哲託市少物以為  
路費遂簽御諱如與平交其意豈在物耶正為行計已  
迫欲速相救援耳豈意舉朝叛臣他腸有在坐視君父  
如棄路人陛下若不正其罪無乃辜二聖乎臣竊惟去  
年治王甫蔡京等罪不肯果決費臺諫一年之力遂致

邊事有失防閑臣愚欲乞先立罪格然後按籍定刑使凡有司者皆不得以容私焉則一按而定可以絕後患矣諸侍從官而偽為執政者諸庶官及宮觀而起為侍從者與撰勸進文獻赦書求事務官與因張邦昌改名者是皆已不復知有宋德矣臣請定為叛臣之上諸執政侍從臺諫曾稱臣於偽楚及拜於庭下者及願為奉使與庶官升擢差遣者是皆臣服偽楚矣臣請定為叛臣之次叛臣之上乞置於嶺外叛臣之次乞遠小處編

管仍乞帶叛臣名目若夫卿監以下庶官也朝廷初不以國士待之亦安得以國士責之若未嘗升擢及如前所論二等之罪惟戴偽楚供職不廢以苟祿食而已臣乞赦之然亦乞籍定姓名從此不復用為臺諫侍從矣蓋惡其無立也若用此法則一網而盡不惟可以上報二聖之德亦所以破天下姦雄之膽也使舉朝之臣畧無姦雄則人人可與同腹心矣予有臣三千而一心此武王之所以勝紂也況以天下之大而除邊難乎惟陛下

下察之取進止

肅又奏曰臣竊聞人臣之事君有毫髮之私必有欺君之罪人君之治天下有毫髮之私必失天下之心恭惟陛下聰明睿智卓絕今古固非臣愚所能窺測然謂之無毫髮之私則非臣愚所能知也臣切見陛下臨御以來首取前日姦臣講和誤國者如李邦彥白時中吳敏等投之遠方以禦魑魅天下壯士聞之鼓舞以為中興必矣然自靖康以來有專主和者耿南仲與其子延禧

是也閨門之內同惡相濟沮渡河萬全之戰遏勤王已  
到之兵今日割三鎮明日截黃河自謂和議可必無患  
凡戰守之具若無事於切切然者孝慈淵聖皇帝亦以  
東宮耆舊之故信如蓍龜敷奏之語蓋未嘗不從也及  
敵人借和用兵勢不可遏南仲誤國狀已敗露淵聖亦  
不得以私之遂遣南仲出使使之自當南仲偶脫萬死  
以其子延禧之故遂得從陛下左右竊聞陛下欲進大  
兵以援京城又為南仲父子所諫以為和議已成不可

輒壞是則南仲父子主和誤國豈不過於李邦彥等乎  
此陛下親見而熟講之矣又不待臣愚再三之瀆也然  
南仲尚為兩府以宮觀居閒延禧尚為兩制以名邦自  
奉雖南仲自擇不過如此陛下何正邦彥等罪如彼其  
審何容南仲等惡如此其恕豈非以南仲父子於艱難  
之際從陛下日久耶且天子父也羣臣子也舉天下之  
臣皆陛下之子豈復更有親疎之間乎淵聖不忍輒棄  
南仲故有今日之悔陛下之於南仲又何有焉若復容

之臣恐天下得以私心議陛下也且南仲腐儒延禧孤陋進退出處本不足論臣今切切不已正為陛下惜耳伏望明正典刑與李邦彥白時中吳敏等以示天下之公

御史中丞張守上奏曰臣伏見自崇寧以來外則姦臣擅政內則閹寺弄權相為蔽欺以亂主聽卒至禍敗宗社幾危陛下纂承親見既覆之車深懲不遠之鑒勵精政事固宜内外臣寮洗心滌慮精白以承休德而欺罔

之風猶未不變近者特降聖旨為剩員高貴叫稱呂源行下收買竹木搭蓋席屋出賃等事令御史臺體究本臺按驗並無實狀尋具奏聞乞降下告人姓名追呼照對奉聖旨高貴踈放告事人更不追呼臣竊謂此事上聞宜有所自致煩特降睿旨付之有司實賴聖明燭見事情乃加考核設或不付有司便行典憲則一呂源固不足惜人或謂陛下之聰明可欺陛下之命令輕出陛下之賞罰失當一舉而三失之所以累聖德者豈細也

哉夫以陛下英睿天縱而臣下猶敢誕惑如此則罔上之心可以按見使其得逞則變亂是非以白為黑將何憚而不為伏望陛下特詔有司如係朝廷之上得於告言則誣告之律固當舉行如緝捕人直達聖聽則罔上之誅不容恕免欲乞聖慈檢會本臺先奏事理降下姓名以憑按治庶幾防微杜漸使小人有所懲戒而欺罔之風息矣

侍御史孫覲奏曰臣伏見女真大帥擁萬騎入朔方跨

大河直犯京闕忽睹神州隩區金城湯池之高且大也  
斂兵不動遣使議和將相大臣盍量彼已之勢勿亟勿  
徐示以閒暇使之疑懼有虎口之虞壓以重兵不戰而  
威之使去此百全之上計也忽傳李綱劫寨之敗上驚  
朝聽下駭羣情為之奈何綱本書生素不知戰力小圖  
大桃發兵禍以帷幄之臣行穿窬之謀以王者之師為  
攻劫之計藉令出於敵人不意偶獲小利猶為怒敵以  
誤朝廷而狂率無謀漏言於旬日之先提數千兵以入

空寨敵圍四合盡驅而納諸隍中無一存者九重帝居  
宗廟社稷所在而僥倖於一擲滔天之罪車裂以徇死  
有餘誅方從薄罰而太學諸生陳東等聚衆伏闕鼓倡  
羣小妄謂宰相連結強隣開闢延敵欲起李綱復還兵  
柄俄頃間嘯聚數萬撾登聞鼓呼聲動地手擲瓦礫狙  
擊大臣屠裂中貴人流血滿道天子震懼與之召還李  
綱然後解去自古秉亂板蕩大壞書傳所載未有如此  
之甚者也唐德宗時除國子司業陽城為道州刺史太

學諸生詣闈請留夫城者道德文行一世標表常率諫  
官合遏裴延齡不得為宰相名震天下諸生請留以為  
師範朝廷所當從從之是衆為政也太學者賢士之開  
禮義之所自出也朝廷衆建師儒營宮室豐餼廩以養  
士祭酒司業以率其屬博士掌訓導正錄掌規矩恩禮  
深厚教法明具士當洗心易慮以承上之休德陳東等  
乃幸天下有大變蔑視官師不告而出怙衆興訛厚誣  
朝廷朋比罪人迫脅君父肆行殺戮遂至大亂而李綱

不知羞愧尚戴其面立於朝端東安坐學宮洋洋自若  
失令不治他日必有握兵之臣劫制天子武夫悍卒戕  
害將帥縣殺其令丞郡殺其守尉以衆暴寡必自此始  
矣臣承乏國子司業時童貫修建武學落成矣陳東為  
教諭議率同列獻書童貫請車駕臨幸其中有不從者  
遂至譁譁臣聞之曰武學落成何預太學有云頃者乘  
輿幸太學而武學生例被恩賜此東所以建獻書之議  
蓋東狂生不守分義其志止欲圖尺寸之柄猖狂不已

以至稱亂今雖未即典刑當具申學法屏之遠方終身  
不齒為多士之戒無令覆出為惡以階禍亂天下幸甚  
御史中丞廖剛乞禁妖教疏曰臣伏覩刑部關報臣寮  
上言乞修立喫菜事魔條禁務從輕典奉聖旨令刑部  
看詳申尚書省臣謹按王制曰執左道以亂政殺假於  
鬼神時日卜筮以疑衆殺非樂於殺人為其邪說詭道  
足以欺惑愚衆使之惟已之從則相率為亂之階也今  
之喫菜事魔傳習妖教正此之謂臣訪聞兩浙江東西

此風方熾倡自一夫其徒至於千百為羣陰結死黨犯  
罪則人出千錢或五百行賄死則人執柴一枝燒焚不  
用棺槨衣食無復喪葬祭祀之事一切務滅人道則其  
視君臣上下復何有哉此而不痛懲之養成其亂至於  
用兵討除則殺人將不可勝數矣宣和間江浙數州已  
見此事厥鑒未遠也臣聞傳習事魔為首之人蓋有所  
利而為之誑惑愚民以禍福而取其財物謂之教化  
此最不可恕者推究為首之人峻法治之自當衰息若

不分首從槩欲以不應為坐之恐非所以戢姦弭亂也  
臣謂貧窮而為盜賊情或可恕事魔非迫於不得已也  
故為邪僻敗壞風教之事其措心積慮已不順矣是故  
易誘為亂也如被誘之人尚或可以閥略彼為首者雖  
未有不順之迹安可輕恕欲望睿旨并送刑部看詳施  
衍

吏部侍郎李光論孫覲劄子曰臣伏覲紹興元年十二  
月十四日三省同奉聖旨備坐祖宗舊制應贓吏決杖

配諸州牢城蓋謂軍興之際不免時有科率若更容縱  
賊吏並緣為姦則民力愈弊此有以見陛下意在生靈  
深疾貪汙命下之日孰不相慶今已累月而諸司按察  
官循習既久恬不為怪遂使朝廷美意委為空文臣竊  
痛憤伏自艱難以來朝廷一切姑務涵貸凶貪之徒割  
剥生靈無所忌憚況朝廷行法當自貴近始臣伏見前  
知臨安府孫覲在任貪汙不法遠近播傳諸司懼其一  
旦復用則為己害不敢按發覲之為人朝廷所知前後

臣僚論列罪大惡稔至辱罵君父甚於仇讎有臣子所不忍聞者陛下貸而不誅又使復典郡寄於觀恩德厚矣乃不悛革益肆無賴到任之初以軍期為名拘九邑縣令在府勒令出錢共肆萬伍千餘緡名曰助軍不附文歷又將親信使臣毛汝能辟為都監文林郎毛珪權錢塘縣令令二人提領本府應干倉場庫務偷盜轉易不可稽考郡中官僚相顧側目至有人生五馬貴莫受二毛侵之語臨安府捉獲酷責私酒百姓其家富厚觀

令珪受錢一千貫更不解送所司至帖下本縣直行放免又遣所親姓董人乞覓過新城縣百姓唐邦臣等錢一千五百貫皆有跡狀除代之後將犒賞庫金銀錢物與都吏專知官等分受比至得替其公庫供帳之物並不發還及將空名度牒官告等移易妄用收附不明監司往來厚加結納每到發送饋謂之合食日事燕遊每會不下百餘千以此上下相蒙無緣顯露伏望聖慈奮發乾剛出自睿斷送大理寺或差臺官一員就府置司

體究候贓證分明捕逮送獄依法斷遣以警具僚其屬邑縣令及人吏等迫於威勢者贓非入已或許其自首庶幾遠近聞風咸知畏戢實天下幸甚取進止

吏部員外郎陳公輔上疏曰臣聞今日之禍實由公卿大夫無氣節忠義不能維持天下國家平時既無忠言直道緩急詎肯伏節死義豈非王安石學術壞之邪議者尚謂安石政事雖不善學術尚可取臣謂安石學術之不善尤甚於政事政事害人才學術害人心三經字

說詆誣聖人破碎大道非一端也春秋正名分定褒貶  
俾亂臣賊子懼安石使學者不治春秋史漢載成敗安  
危存亡理亂為聖君賢相忠臣義士之龜鑑安石使學  
者不讀史漢王莽之篡揚雄不能死又仕之更為劇秦  
美新之文安石乃曰雄之仕合於孔子無可無不可之  
義五季之亂馮道事四姓八君安石乃曰道在五代時  
最善避難以存身使公卿大夫皆師安石之言宜其無  
氣節忠義也

中書舍人虞允文上言曰臣伏惟神宗皇帝作新官制一清樞密都承旨之班更用士人視儀從列而副都承旨之選與之俱重侍殿廬親承邃旨武臣之除職清地禁未有踰於此者所以激厲其徒使之趣名節立事功為百世勸也謨烈之傳至陛下而不顯不承之故近歲廖廖弼以非才而用未幾罷黜之旨從天而下當時人心咸大和說其後多虛其選不以輕授陛下傳祖宗心法之妙顯顯如此書之國史足為無窮之光今元居實

者外廷之議以為本出給使之流未嘗歷親民近邊差遣而所出入交結皆內侍之雄欺隱御前金帛之訟見歷臺省未決一旦無尺寸功効亟登清班使將士解體非今日細事又朝廷施行之初不經門下書讀致議者聞然益以為疑兩日以來物論籍籍不肯置若臣輒擬詞以進實負陛下使令之意罪不容誅矣所有詞頭臣不敢書行

翰林學士汪藻奏曰臣准中書省送到詞頭一道奉聖

旨知高郵軍趙士琰因發運司舉留令依舊在任其稽違朝命特降兩官蘇遲別與差遣令臣撰詞進入者右臣竊以人主之柄賞罰而已賞必及善然後人知所勸罰必及惡然後人知所懲未聞且賞且罰而可以為政也謹按趙士琰始以蘇遲赴官不肯受代朝廷怒其稽違朝命特降兩官又緣自陳四任堂除粗有勞効及發運使李祜劄子保奏復令在任臣不知朝廷以士琰為是耶為非耶若以為是則方命不從者堯四凶之罪也

不應使之在任若以為非則借留在任者漢循吏之恩  
也不應使之降官以一士琰之身而一日之間可賞可  
罰臣竊惑之且士琰自陳歷任有勞至據其所臨推之  
不去公違詔條不顧義理亦可謂無廉恥甚矣縱方今  
乏材豈無一人可治高郵如士琰者耶況新除人別與  
差遣在任人遷延依舊使有力者交結當權無日不居  
官無援者待闕及期輒為人所奪有十年不霑一日之  
祿者宣和之風也今陛下中興當痛革此弊奈何因士

璫復啓僥倖之門耶臣以為不罷士璫恐人之效其所為苟欲貪祿則冒恥自陳及計會監司僥倖保奏者皆得之矣此風漸不可長伏望聖慈別擇能吏知高郵軍或且令蘇遲赴任斥去士璫為後來鄙夫之戒所有趙士璫依舊在任降兩官詞頭臣未敢撰進

戶部侍郎李彌遜上奏曰伏覩近降指揮差新除起居郎莫將充送伴使臣契勘比者金人遣使畫地講和旬月之間禮儀未定中外惶駭人情不安賴陛下聖度剛

明曲從羣議斷以不疑致使金人屈服致書而去國人  
欣悅萬口一詞天下幸甚甚將輕儇不端素無所守揣摩  
迎合僥倖一時意為身謀不恤社稷之計而使將與賓  
客言深恐將遂非文過姦訛不悛觀望反覆陰搖敵情  
上負陛下聖孝愛親之念況將越次而遷已拂公議遽  
委使節俯示曲全為將計則善矣非國家之福也伏望  
陛下更加聖慮罷將送伴使別選忠信之人協濟國事  
臣職在論思苟有所見不敢緘默冒瀆聖聽不任恐懼

戰越屏營之至

時金遣使要以難行之禮秦檜為相力贊屈己之說外  
議羣起計雖定而未敢行會龍如淵說檜宜擇人為臺  
官使擊去異論則事遂矣於是如淵施廷臣莫將皆據  
要地人皆駭慢吏部侍郎晏敦復上疏言前日如淵以  
附會和議得中丞令施廷臣又以此躋橫榻衆論沸騰  
方且切齒莫將又以此擢右史夫如淵廷臣庸人但知  
觀望將則姦人也陛下奈何與此輩斷國論乎乞加斥

逐杜羣枉門力為自治自彊之策

金遣使議和監察御史施廷臣抗章力贊和議吏部尚書張燾率侍郎晏敦復上疏曰仰惟陛下痛梓宮未還兩宮未復不憚屈己與敵議和特以衆論未同故未敢輕屈爾幸小大之臣無復異議從容獻納庶幾天聽為回卒不敢屈此宗社之福也被施廷臣乃務迎合輒敢抗章力贊此議姑為一身進用之資不恤君父屈辱之恥罪不容誅

時邊報王倫來歸殿中侍御史黃龜年劾檜專主和議沮止恢復植黨專權漸不可長乃上書曰臣聞一言而盡事君之道曰忠罪莫大於欺君一言而盡輔政之道曰公罪莫大於私已臣人者背公而徇私則刑賞僭濫慮人主之照其姦則合黨繙交相與比周熒惑主聽故附下罔上之黨盛而威福之柄下移禍有不可勝言者伏見秦檜還自金國陛下驟任不一年而超至宰輔乃不顧國家盜威福在己欲永塞言路書上檜罷併劾檜

黨王喚王暭王守道皆罷之檜罷仍授觀文殿大學士  
提舉江州太平觀官如故龜年又奏曰比論秦檜徇私  
欺君合正典刑投諸裔土以禦魑魅今乃任便居住雖  
陛下曲全大臣之禮奈檜姦狀暴露復寵以儒學最上  
職名俾優游琳館聽其自如律斷羣盜必分首從為之  
從者皆已伏誅獨置渠魁可乎又曰臣聞恩莫隆於父  
子義莫重於君臣不義則後其君不仁則遺其親君親  
既然則何忌憚而不為檜厚貌深情矯言偽行進迫君

臣之勢陽為面從退恃明比之姦陰謀沮格上不畏陛下中不畏大臣下不畏天下之議無忌憚如此欺君私已有之即可黜況檜之欺與私顯著者為多乎章凡三上遂褫檜職

孝宗淳熙六年夏大旱詔監司郡守條具民間利病知南康軍朱熹上疏言天下之務莫大於恤民而恤民之本在人君正心術以立紀綱蓋天下之紀綱不能以自立必人主之心術公平正大無偏黨反側之私然後有

所繫立君心不能以自正必親賢臣遠小人講明義理之歸開塞私邪之路然後乃可得而正今宰相臺省師傳賓友諫諍之臣皆失其職而陛下所與親密謀議者不過一二近習之臣上以蠱惑陛下之心志使陛下不信先王之大道而說於功利之卑說不樂莊士之謙言而安於私督之鄙態下則招集天下士大夫之無恥者文武彙分各入其門所喜則陰為引援擢實清顯所惡則密行訾毀公肆擠排交通貨賂所盜者皆陛下之財

所竊者皆陛下之柄陛下所謂寧相師傅賓友諫諍之臣或反出其門牆承望其風旨其幸能自立者亦不過齷齪自守而未嘗敢出一言以斥之其甚畏公論者乃能畧警逐其黨之一二既不能深有所傷而終亦不敢正言以擣其囊橐窟穴之所在勢成威立中外靡然向之使陛下之號令黜陟不復出於朝廷而出於一二人之門名為陛下獨斷而實此一二人陰執其柄莫大之禍必至之憂近在朝夕而陛下獨未之知也

孝宗時熹提舉浙東常平茶鹽公事奏知台州唐仲友  
違法促限催稅搔擾飢民事狀曰臣昨訪聞知台州唐  
仲友催稅急迫致得民戶流移等事即具大略奏聞令  
巡歷到本州天台縣據人戶遮道陳訴本縣夏稅絍一  
萬二千餘匹錢三萬六千餘貫緣本州催促嚴峻六月  
下旬已納及絍五千五百餘匹錢二萬四千餘貫而守  
臣唐仲友嗔怪知縣趙公植催理遲緩差人下縣追請  
赴州縣人聞之相與號泣遮攔公植回縣情願各催戶

下所欠零稅絹二千五百匹限十日內赴州送納方得  
放免仲友遂專牒縣尉康及祖催納零欠更不照應三  
限條法及近日累降指揮牒內明言要在六月終以前  
一切數足又牒縣尉催淳熙七年八年殘欠官物專差  
人吏在縣監督及節次差下承局禁子等人絡繹在道  
乞覓搔擾無所不至又據寧海人戶論訴本州專差天  
台主簿張伯溫及州吏在縣催督去年殘米下戶丁稅  
百端搔擾本司見行追問未到而聞張伯溫在寧海縣

追呼迫急本縣人戶不堪其擾相與羣聚喧譟欲行毆擊伯溫知之僅得走免臣竊惟台州頻年災傷民力凋弊仲友儒臣幸得蒙恩典郡專以布宣德澤摩撫疲瘵為職而乃舞智徇私動乖仁恕在法夏稅省限至八月三十日下限方滿近來戶部擅行指揮必要七月盡數到庫已是違法而仲友乃於戶部所促之限又促一月公行文移督迫屬縣頓辱良吏苦虞飢民使千里之人愁怨歎息無所告訴甚失聖朝所以選用賢良惠恤鰥

寡之本意又況方此饑饉人心易搖萬一果然生事不知何以彈壓臣雖踈賤誤蒙任使職在刺舉不敢不言欲望聖慈先將仲友亟賜罷黜以慰邦人之望其不公不法事件臣當一面審實以聞須至奏聞者

熹又按唐仲友狀曰臣猥以踈賤叨被使令雖衰病之餘精力不逮而驅馳勞瘁不敢頃刻自安者誠以陛下知遇之深而思有以仰報萬分也今者不幸不得其職臣實有罪無所逃刑然有血誠敢勤天聽臣昨在紹興

府道間聞得台州守臣唐仲友催稅刻急民多流移即  
於七月十九日具狀奏聞至二十三日入本州界又得  
其實再以狀奏至二十七日又得其貪汚淫虐蓄養亡  
命事狀數件復具條奏竊謂聖明威斷必不容貸雷霆  
震擊將不旋踵而側聽兩旬未奉處分仲友始者自知  
罪贓應死亦甚惶恐此數日來忽復舒肆追呼工匠言  
語譁張又遣客將傳語通判趙善伋云已得指揮差浙  
西提刑前來體究未可引斷竊詳上件事理元係本公司

奏劾若有指揮合是本司被受本司既無被受仲友何  
緣聞知便敢傳布意欲施行觀此氣象若非有人陰為  
主張擿語消息仲友罪人何敢遽然如此是則不唯臣  
竊惑之而此州闔境千里前日歡呼鼓舞之民莫不人  
懷疑懼慄乎如虎兒之將復出於柙也臣伏見仲友本  
貫婺州其亡弟之妻王氏見隨仲友同在郡舍仲友近  
日又為吏部尚書侍御史所薦而其支黨共為貪虐之  
人又皆臺省要官子弟親戚況仲友為人陰狡有素事

窮勢迫于求請託何所不為竊慮以此之故黨援衆多  
曲為掩蔽使臣孤忠無路上達有以仰累日月之明兼  
衢婺明州災傷極重而處州士民近亦告急臣欲自此  
遍走諸州計度採荒事務而台州之人以仲友未罷恐  
其一旦復出為惡邀留臣車不容起發臣遂不免申尚  
書省且住本州恭俟奏報竊慮違程日久按行遲緩有  
失數州飢民之望仰貽陛下宵旰之憂靜言本末由臣  
愚闇見事遲晚既不能及早按劾致留天誅又不能阿

徇權豪共為欺蔽有此二罪難以復居官次顧以本路  
飢民陷於溝壑未敢自効謹復具此曲折昧死奏聞欲  
乞睿斷先將仲友早賜罷黜付之典獄根勘行遣以謝  
台州之民然後申詔攸司議臣之罪重寘典憲以謝仲  
友之黨臣不勝幸甚干犯天威無任恐懼戰悚之至須  
至奏聞者

時趙汝愚乞按提刑吳宗旦運判張伯垓疏曰臣聞身  
修而后家齊家齊而后國治未有其身不修而能齊其

家其家不齊而能治其國者也謹按知嘉州張伯垓到任以來為政苛急督責財賦人多致死縱容子弟親隨干預政事交通貨賂出入倡館醜聲四聞初緣提點刑獄吳宗旦與之結姻遂相亵狎每用妓樂燕飲常至達旦馴致兩家子弟人有所私衆皆指名不敢塵瀆今歲上元諸郡皆不敢燕集唯聞嘉州與提刑司張燈以多相勝連夕遊宴肆為歡樂場務官司俱被科擾其後宗旦不避親嫌謬以伯垓為臧最遂誤朝廷除授就陞本

路運判呼索從物並要如法近聞兩屬官管押衙兵方到客次伯垓親隨數人遽執衙兵司係縛筆打取索錢物至數百千兩屬官見之遂慙而退運司遠接舟船人從自有條例更於嘉州諸縣須索船錢寺院科取夫腳各有定數不知復作何用初政如此人將何堪今一路官吏百姓聞其先聲無不震恐臣謬將使指理難坐視伏望聖慈將吳宗旦張伯垓特賜罷黜使監司郡守咸知修身齊家之道以惠遠民幸甚

汝愚又按汀守趙汝訥奏曰臣契勘本路汀州其地嶮僻其俗暴悍素號難治稍失調御輒敢數百為羣依山阻險抗拒官司為守臣者宜得寬猛相濟善撫柔其民者留意惠養庶幾上下相安幸於無事今訪聞得守臣趙汝訥自到任以來貪淫暴縱日事游宴不恤其民催督諸縣積年欠負急於星火去秋雖蒙朝廷罷免軍器物料本州不敢催理却以舊欠為名抑令諸縣認納如未罷免之數諸縣既無軍器科名往往復苛取暴斂以

塞其意至有知縣不堪其苦欲自縊而死者本州兩獄  
禁繫欠負之人飢餓而死者前後蓋以百數却將所收  
錢物恣為妄費今歲上元買琉璃燈至數千盞所費萬  
餘緡所愛官奴號蔡素嬪及隨行私僕皆交通關節貨  
賂公行一郡之政惟素嬪之言是聽委任進納人司理  
張珙及清流縣丞曾註使權職官皆招權納賂妄作威  
福凡暴虐刻薄之政二人者實助之然也本州久闕推  
官又司理已過滿半年以上代者恐違年遣人呼索迓

吏汝劫輒追其人叱而去之其私於二人如此臣等恐  
其更有不公不法事件除已差官前去體究外今一郡  
之人如在湯火之中朝夕不能自保竊恐別致生事欲  
望聖慈特降指揮將汝劫張珙曾註先賜罷斥一方幸  
甚

汝愚又繳韓彥質除知臨安府奏曰臣竊惟臨安雖號  
為駐蹕之地其實事體所關蓋與神州無異凡為守臣  
者謂宜精選公忠端亮深知治體者為之所補蓋非他

郡比也而近歲以來頗乖選任所用如吳淵輩例皆掊克貨財交結權倖以自封殖至於一郡政刑紀綱法度無不大壞所欠行戶錢物家家以千萬計吳淵方有宮觀之命臣聞閭里之間無不歡呼鼓舞人人舉手加額以為陛下聖明至有逐行逐戶率斂錢物市酒相慶者此其情蓋可見也數日以來未曾除代上自士大夫下至閭境百姓皆謂朝廷不輕謀帥必得公忠端亮深知治體之人庶幾稍革前日之弊而命下之日卒用彥質

臣恐都人愈失望矣臣與彥質猶未相識臣亦不能深知其才行但以一事觀之臣故知其不可始緣今夏都城遺火吳淵自知無所逃罪遂嫁禍於民居建為拆屋之說是時一城大擾百姓怨嗟然猶有可諉者謂可暫勞而永逸也今聞彥質效尤復欲自都門之外至鎮江府沿路民居屋宇並要除拆數尺於是數郡之民又大驚擾怨嗟盈道所不忍聞而彥質又不能周密頗漏其意至於道路相傳皆謂翠華不日臨幸人言籍籍遂不

可掩誠恐鄰國聞之所繫顧不重哉加之彥質此行實與北使俱往萬一北使所至或有得於觀聽之間亦豈能無疑也臣以是知彥質以謀國則甚踈以臨民則甚擾以事上則不忠其意不過欲託為夸大可喜之說以迎合陛下之意而竊取美官爾其實非能為國家深計也陛下英明天縱如揭日月彥質情狀豈不洞見今乃付以京尹之任寵以祕殿之名望其能體國愛民臣知其不能矣臣愚伏望聖慈收還新命精選良吏更定規

模庶幾漸復祖宗之制亦使要功生事為國斂怨之人  
自今稍知懲創天下幸甚

汝愚又按永福知縣高槩羅源縣尉龔史良奏曰臣等  
竊惟國家之治專以仁厚寬恕為本張官置吏凡以為  
民其間有奉職失當致百姓有無辜而死者臣等職在  
按察不敢隱默臣等伏見本州去歲豐熟今歲米價不  
至甚貴永福縣在市白米每斗不過二百三十文足自  
不須賑糶官米知縣事宣教郎高槩擅作常平米出糶

其減價太低又措置無術六月二十日有男子婦人小孩約五千餘人擁併入縣互相蹂踐至林全等死者七人傷者一人又羅源縣先有行者光潤因帶銀貨入城中途為盜所殺本縣尉廸功郎龔史良疑是鄰近景跡人項德為盜遂併捕其子受僧就本廳逐日訊勘經涉二十餘日終無贓證又不依條申解本縣致項德被苦身死本州除已追合干人送獄根勘依條施行及將高槷先次對移懷安縣丞外其高槷龔史良雖是緣公致

罪情在可矜然事干人命不容但已伏望聖慈特賜黜  
責以謝無辜之民

吏部郎官范成大奏曰臣伏覩中書省錄黃指揮宋脫  
召赴行在臣謂率土之濱莫非王臣陛下欲見一臣察  
何所不可天鑒之下將無所逃用捨廢置皆未可知固  
無必不可見之理但臣採之公議有不得而默者契勘  
宋脫當秦檜柄國之時號為親昵用事為世指目章章  
尤顯者士大夫醜其姓名于今有年矣臣取會前後章

疏姦污之狀固不一端為奉使則興販北貨攝京府則  
强畧倡優任版曹則買諸軍之銀領贍軍則受辟官之  
賂司建康留鑰則專為權門起造園宅如此之類未易  
槩舉亦未暇論也究其始初罷逐之由正緣司計不職  
以致左帑闕乏支遣不行至用臨安公使庫及激賞贍  
軍等庫錢物那移又勘虛旁令軍人自往漕司支請若  
漕司無錢幾致生事臣察論其身為計臣經畫如此是  
時檣猶無恙而貺已斥矣則其才術已試大繆明白如

此今聞忽有召命竊恐或謂其有富國才術欺陛下者  
只攷元罷戶部因由則是非虛實灼然可見臣聞人才  
難得弗忍終弃聖人之用心也使君子之人而偶罷憲  
網固當杖拭而進之使小人而有才亦可覆其玷缺駕  
馭以驅使之今以貺為君子而偶罷憲網邪則平生姦  
污之聲徧于海隅矣以為小人而有才者耶則當兵釁  
未開之前朝廷積富之後從容版曹而使帑藏空乏至  
以虛旁撥遣軍人亦可駭矣竊恐一旦進用不惟無益

於國其餘黨類帖息伏潛者皆將動心經營僥倖復進  
徒使疑議四起又費彈壓臣恭惟陛下昭德塞違以臨  
照百官正欲安靖國人純一風俗而已將來貺或有所  
除授必致衆論紛紛以發其不靖之機臣蒙被陛下擢  
寘西掖正典書命比之諸臣尤不當緘默伏惟聖慈儲  
神委照攬臣此章特留聖念別賜處分不勝幸甚

成大又上劄子曰臣聞聖人在上所以虛己以來天下  
之言者蓋欲廣見聞資啓沃以輔聰明之所未及也至

於朝變夕改乘時射利之徒候伺上意耳剽口傳為迎合之說取容一時以釣爵位者將安用之哉國家之於北敵可謂血讎矣是讎也天地神明社稷蒼生其誰不知陛下受太上之託荷列聖之休不忘北向以雪宗廟大恥可謂有志矣是志也天地神明社稷蒼生亦其誰不知乃宸謨聖策甫欲有所設施而一時射利之徒如前所云者即便鬢髮指意爭獻迎合之說繙舊史以談計謨檢方志以述地理詢北客以撰事機走權門以伺

報應如是而已聖朝以其說之惓惓不吝賞激至有布衣補官而去者甚衆一人得志轉相倡和競以迎逢為進身事業傳播既廣四方翕然洩陛下之神機漏朝廷之密指甚非國家之利也伏望聖慈與腹心輔臣思大計之甚重審先務之當行日夜淬厲自圖實効凡迎合之虛言取悅一時之聽無益於國而徒利其身者不必更誘而進之以開倅門而玩大謀天下幸甚

歷代名臣奏議卷一百八十三